

হায়রে বাংলাদেশ ...

ডঃ মোহাম্মদ আবদুর রায়হাক

কেউ বা বলেন জয়বাংলা, কেউ বা জিন্দাবাদ
দেশের ভাগ্যে জুটেছে তবু কেবল নিন্দাবাদ ।
দেশ বড় না দল বড় ? না দলের নেতা বড় ?
নেতারা সব ব্যস্ত ভেবে, দেশ যে মরো মরো !

বাংলাদেশের পথে ঘাটে হেফায়তের ঢেউ;
কেউ বা বলেন খোদা হাফেয, আল্লাহ হাফেয কেউ ।
তবু সেথায় নানান ভাবে মরছে মানুষ দেদার,
বোমার ঘায়ে, ক্রস-ফায়ারে খবর রাখে কে কার ।

বাপের কোলে মাসুম বাচ্চা মরলো খেয়ে গুলি -
মন্ত্রী বলেন আল্লাহর মাল আল্লাহ নিচ্ছেন তুলি ।
লঞ্চডুবিতে মরলে মানুষ নৌ-মন্ত্রী বলে
‘আমি কেন রিজাইন দিব মানুষ ডুবে ম’লে’ ?

আগুন লেগে, দালান ধ্বংসে মরছে গরীব শ্রমিক -
মালিকরা সব পার পেয়ে যায়, এ এক আজব কমিক ।
অর্থমন্ত্রী, জানতে কি চান মঙ্গা কারে কয় ?
ক্ষুধার জ্বালায় জ্যোস্ত মানুষ লাশ যে সময় হয় !

ফাঁসীতে যার ঝোলার কথা তেমনি খুনীর তরে
বাংলাদেশের আইন-মন্ত্রীর চক্ষেতে জল ঝরে
তদ্বিরে তার সেই খুনী পায় রত্নপতির ক্ষমা -
দেশের ভালে হলো আরেক কলংক টিপ জমা ।

রাজাকার আর তাদের দোসর মিটিয়ে মনের আশ
নতুন করে লিখছে বাংলাদেশের ইতিহাস ।
লিখছে এরা ‘শেখ মুজিবর জাতির পিতা নয়’,
‘কোথাকার কে নজরুল ইসলাম’ আর এক মন্ত্রী কয় ।

হায়রে বাংলা, তোমার জন্য এ সরকারের দান -
দুর্নীতিতে বিশ্বে এখন তুমিই চ্যাম্পিয়ান !
আধ ঘন্টায় পাঁচশো বোমা ফুটেছে দেশজুড়ে -
তোমার ভাগ্যে ব্যর্থ দেশের খেতাব কি আর দুরে ?

সিডনী, ২৪ আগষ্ট